

四庫全書

集部

欽定四庫全書

集部

唐百家詩選卷

十八至  
二十

詳校官中書

臣張經田

助教

臣

常循履勘

總校官原任中允

臣王燕緒

校對官中書

臣溫汝适

謄錄監生

臣趙鳴皋

欽定四庫全書

唐百家詩選卷十八

宋 王安石 編

李郢十八首

字楚望大中中進士及第  
為藩鎮從事兼侍御史

夏日登信州北樓

高樓上長望百里見靈山  
雨歇河珠定雲開谷鳥還  
田苗映林合牛犢傍村閒  
始得銷憂處蟬聲催入關

春晚題山家

偶與樵人熟春殘日日來依岡尋紫巖  
挽樹得青梅燕靜銜泥起蜂喧抱藥回  
嫩茶重攪綠新酒略吹醅漠漠蠶生紙  
涓涓水弄苔丁香正堪結留步小庭隈

送人之嶺南

關山迢遞古交州歲晏憐君走馬遊  
謝氏海邊逢素女越王潭上見青牛  
萬臺月照啼猿曙石室煙含古桂秋  
回望長安五千里刺桐花下莫淹留

江亭春霽

江離漠漠荇田田江上雲亭霽景鮮蜀客帆檣背歸燕  
楚山花木怨啼鵲春風掩映千門柳晚色淒寒萬井煙  
金磬泠泠水南寺上方僧室翠微連

友人適越路過桐廬寄題江驛

桐廬縣前洲渚平桐廬江上晚潮生莫言獨有山川秀  
過日仍聞官長清麥壠虛涼當水店鱸魚鮮美稱尊羹  
王孫客棹殘春去相送河橋羨此行

秦處士移家富陽發樟亭懷寄

潮落空江洲渚生知君已上富春亭常聞郭邑山多秀  
更說官寮眼盡青離別幾宵魂耿耿相思一坐髮星星  
仙翁白石高歌調無復松齋半夜聽

暮春山行田家歇馬

雨濕菰蒲斜日明茅厨煮蠶掉車聲青蛇上竹一種色  
黃蝶隔溪無限情何處樵漁將遠餉故園田土憶春耕  
千峰靄靄水滴滴羸馬此中愁獨行

孔雀

越鳥青春好顏色晴軒入戶看沾衣一身金翠畫不得  
萬里山川來者稀絲竹慣聽時獨舞樓臺初上欲孤飛  
刺桐花謝芳草歇南國同巢應望歸

茶山貢焙歌

使君愛客情無已客在金臺價難比春風三月貢茶時  
盡逐紅旌到山裏焙中清曉朱門開筐箱漸見新芽來  
陵煙觸露不停採官家赤印連帖催朝饑暮匄誰興哀  
喧闐競納不盈掬一時一餉還成堆蒸之馥之香勝梅

研膏架動轟如雷茶成拜表貢天子萬人爭噉春山摧  
駟騎鞭聲若流電半夜驅夫誰復見十日王程路四千  
到時須及清明宴吾君可謂納諫君諫官不諫何由聞  
九重城裏雖旰食天涯吏役長紛紛使君憂民慘容色  
就焙嘗茶坐諸客幾回到口重咨嗟嫩綠鮮芳出何力  
山中有酒亦有歌樂營房戶皆仙家仙家十隊酒百斛  
金絲宴饌隨經過使君是日憂思多客亦無言徵綺羅  
殷勤繞焙復長歎官府例成期如何吳民吳民莫憔悴



使君作相期蘇爾

江亭晚秋

碧江涼冷鴈來疎  
閒看江雲思有餘  
秋館池亭荷葉歇  
野人籬落豆花初  
無愁自得仙翁術  
多病能忘太史書  
聞說故園香稻熟  
片帆歸去就鱸魚

鵝兒

臘後閒行村舍邊  
黃鵝清水真可憐  
何窮散亂隨新草  
永日淹留在野田  
無事群鳴遮水際  
爭來引頸逼人前

風吹楚澤蒹葭暮  
看下寒溪逐去船

送劉谷

村橋西路雪初晴  
雲暖沙乾馬足輕  
寒澗渡頭芳草色  
新梅嶺外鷓鴣聲  
郵亭已送征車發  
山館誰將候火迎  
落日千峰轉迢遞  
知君回首望高城

江上逢王將軍

虬鬚憔悴羽林郎  
曾入甘泉侍武皇  
鷗沒夜雲知御苑  
馬隨春仗識天香  
五湖歸去孤舟月  
六國平來兩鬢霜

唯有桓伊江上笛臥吹三弄送殘陽

秋晚寄題陸勳校書義興禪居時淮南從事

禪居秋草晚蕭索異前時蓮幙青雲貴翺翔絕後期  
蘇房檉架掩山砌石盆欹劍戟晨趨靜笙歌夜散遲  
谷寒霜狷寂林晚磬蟲悲惠遠煙霞在方平屨杖隨  
骨清須貴達神重有威儀萬卒千蹄馬橫鞭從信騎

酬友人春暮寄枳花茶

昨日東風吹枳花酒醒春晚一甌茶如雲正護幽人壑

似雪纔分野老家金餅拍成和雨露玉塵煎出照煙霞

相如病渴今全校不羨生臺白頸鷄

司馬相如故事

郢自街西醉歸馬鞭墜失崔員外趙祕書知其

闕用皆許見貽俄頃之間二信俱至短長堅重

價不相饒輒抒短章仰酬珍錫

蜀巖陰面冷冥冥偃雪欺霜半露青銛刀剪裁多鵲媚  
細鞞揮拂帶龍腥崖垂萬仞知無影鮮漬千年合有靈  
蘭省貴寮蓬閣吏一時絨贈到雲亭

即目

自笑騰騰者非愁又不狂何為跼似鼠而復怯於麀落  
拓無生計伶俜戀酒鄉冥搜得詩窟偶戰出文場愛雪  
愁冬盡懷人覺夜長石樓多爽氣檉案有餘香運去非  
關拙時來不在忙平生兩閒暇孤趣滿滄浪

羅敷東館亭下流泉云至前山擁咽經歲移時  
掬弄惆悵成章

看山亭下小鳴泉鳴咽難通亦可憐惆悵無人為踈鑿

擁愁含恨過年年

薛逢三首

咸通初為嘉州刺史將作監

偶題黃花驛

孤戍迢迢蜀路長  
烏鳴山館客思鄉  
更看絕頂煙霞外  
數樹巖花照夕陽

涼州詞

昨夜蕃軍報國讐  
沙州都護破涼州  
黃河九曲今歸漢  
塞外縱橫戰血流

宮詞河滿子

繫馬宮槐老持杯店菊黃故交今不見流恨滿川光

鄭畋一首

謁昇仙太子廟

在昔靈王子吹笙遡沆寥六宮攀不住三島互相招  
亡國原陵古賓天歲月遙無蹊窺海曲有廟訪山椒  
石帳龍蛇拱雲樓彩翠銷露壇裝琬琰真像寫松喬  
珠館青童宴琳宮阿母朝氣輿仙女侍天馬吏兵調  
湘妓紅絲

瑟秦郎白管簫西城邀綽約南嶽命嬌嬈句曲觴金洞  
天台嘯石橋晚花珠弄藥春茹玉生苗二景神光祕三  
元寶籙饒霧垂鴉翅髮冰束虎章腰鶴馭爭銜箭龍妃  
各獻綃衣從星渚浣丹就日宮燒物外花常滿人間葉  
自凋望臺悲漢戾閱水笑梁昭古殿香殘地荒堦柳長  
條幾曾期七日無復降重霄嵩嶺緬天漢伊瀾入海潮  
何由得真訣使我珮環飄

薛能二十八首



龍門八韻

河浸華夷濶山橫宇宙雄  
高波萬丈瀉夏禹幾年功  
川迸晴明雨林生旦暮風  
人看翻進退鳥性斷西東  
氣逐雲歸海聲驅石落空  
近身毛乍豎當面語難通  
沸沫歸何處盤渦傍此中  
從來化髻者攀去路應同

送李溟出塞

邊城官尚惡况乃是羈遊  
別路應相憶離亭更少留  
黃沙人外濶飛雪馬前稠  
甚險穹廬宿無為過代州

山中尋僧

盡日行方到何年獨此林  
客歸唯鶴伴人少似師心  
坐石落松子禪床搖竹陰  
山靈怕驚定不遣夜猿吟

冬日送僧歸吳中

去掃東林下間持未遍經  
為山低鑿牖容月廣開庭  
舊業雲千里生涯水一甌  
還應覓新句看雪倚禪局

恭僖皇太后挽歌

八月曾殊選三皇固異儀  
祔陵經灞澹歸賄雜華夷旌

去題新謚宮存錄素惟重泉應不恨生見太平時

題逃戶

幾世葺農桑凶年竟失鄉  
朽關生濕菌傾屋照斜陽  
雨水淹殘白葵花壓倒牆  
明時豈致此應自負蒼蒼

寓居有懷呈舊知

綠草閉深院悄然花正開  
新年人未去戊日燕還來  
雨地殘枯沫燈窻積舊煤  
歸田語不忘樗散料非才

夏日蒲津寺居

日日閒車馬誰來訪此身  
一門兼鶴靜四院與僧鄰  
雨室牆穿溜風窻筆染塵  
空餘氣長在天子用平人

開元觀閒遊因及後溪偶成二韻

山屐經過滿逕蹤  
隔溪遙見夕陽春  
當時諸葛成何事  
只合終身作臥龍

嘉秦驛

盡室可招蒐蠻餘出蜀門  
電涼隨雨氣江熱傍山根  
蠶月縹絲路農時碌碡村  
干將磨欲盡無位可酬恩

褒斜道中

十驛褒斜到處慵眼前常似接靈蹤  
江遙旋入旁來水山濶猶藏向後峰  
鳥徑惡時應立虎畝田開日自燒松  
行吟却笑公車役夜發星馳半不逢

新雪

細落麤和忽復繁頓清朝市不聞喧  
天迷皓色風何亂地濕春泥土半翻  
香暖會中懷岳寺樵鳴村外想家園  
門吟只愛煎茶澹斡破平光向近軒

秋夜旅舍寓懷

庭鏤荒蕪獨夜吟  
西風吹動故山心  
三秋木落半年客  
滿地月明何處砧  
漁唱亂沿汀鷺合  
鴈聲寒咽隴雲深  
平生只有松堪對  
露浥霜欺不受侵

許州題德星亭

漢水南流東有隄  
隄邊亭是武陵溪  
槎松配石堪僧坐  
藥杏含春欲鳥啼  
高處月生滄海外  
遠郊山在夕陽西  
頻來不似軍從事  
只戴紗巾只杖藜

送判官赴京

闕下情偏已絕稀  
天涯身遠復相依  
庭花每對從容落  
夜燭多同笑語歸  
君子是行應栢署  
鄙人何望即柴扉  
青雲若遇交親話  
白壁無心待發揮

獻僕射相公

清如冰玉重如山  
百辟嚴趨禮絕攀  
強虜外聞應破胆  
平人長見盡開顏  
朝廷有道青春好  
門館無私白日閒  
致却垂衣更何事  
幾多詩句詠關關

漢南春望

獨尋春色上高臺三月皇州駕未回  
幾處松筠燒後死誰家桃李亂中開  
姦邪用法元非法唱和求才不是才  
自古浮雲蔽白日洗天風雨幾時來

清河泛舟

都人層立似山丘坐嘯將軍擁棹遊  
遼郭煙波浮泗水一船絲竹載涼州  
城中覩望皆丹雘旗裏驚飛盡白鷗  
儒將不須誇卻穀未聞詩句解風流



老圃堂

邵平瓜地接吾廬  
穀雨晴時偶自鋤  
昨日春風欺不在  
就床吹落讀殘書

盤屋官舍新竹

心覺清涼體似吹  
滿風輕撼葉垂垂  
無端種在幽閒處  
衆鳥嫌寒鳳未知

贈老僧

清瘦形容八十餘  
瓠懸籬落似村居  
勸師莫羨人間有

幸是元無免破除

折楊柳

和花煙樹九重城  
夾路春陰十萬營  
唯向邊頭不堪望  
一株憔悴少人行

吳姬四首

樓臺重疊滿天雲  
殷殷鳴鼉世上聞  
此日楊花初似雪  
女兒絲管弄參軍

畫燭燒蘭暖復迷  
殿帷深密下銀泥  
開門欲作侵晨散

已是明朝日向西

冠剪黃綃帔紫羅薄施鉛粉畫青蛾因將素手誇纖巧  
從此椒房寵更多

自是三千第一名內家叢裏獨分明芙蓉殿上中元日  
水拍銀盤弄化生

秦韜玉四首

春雪

雲重寒空思寂寥玉塵如糝滿春朝片纔著地輕輕陷

力不禁風旋旋銷惹砌任從香粉妬紫叢自學小梅嬌  
誰家醉捲珠簾看絃管堂深暖易調

對花

長與韶光闇有期可憐蜂蝶却先知誰家促席臨低樹  
何處橫釵帶小枝麗日多情疑曲照和風得路合偏吹  
向人雖道渾無語幾勸王孫到醉時

貧女

蓬門未識綺羅香擬托良媒益自傷誰愛風流高格調

共憐時世儉梳粧敢將十指誇纖巧不把雙眉鬪畫長  
每恨年年壓金線為他人作嫁衣裳

送友人罷舉除南陵令

共言愁是酌離杯況惜弦歌枉大才獻賦未為龍化去  
除書猶喜鳳銜來花明驛路燕脂煖山入江亭菴畫開  
莫把新詩題別處謝家臨水有樓臺

羅鄴五首

牡丹

落盡春紅始著花花時比屋事豪奢買栽池館恐無地  
看到子孫能幾家門倚長衢攢繡輓幄籠輕日護香霞  
歌鍾滿座爭歡賞肯信流年鬢有華

洛水

一道潺湲濺暖莎年年惆悵是春過莫言行客聽如此  
流入深宮恨更多橋畔月來清見底柳邊風去綠生波  
縱然滿眼添歸思未把魚竿奈爾何

出都門

青門春色一花開  
長到花時把酒杯  
自覺無家似潮水  
不知歸處去還來

水簾

萬點飛泉下白雲  
似簾懸處望疑真  
若將此水為霖雨  
更勝長垂隔路塵

賞春

芳草和煙暖更青  
閒門要路一時生  
年年點檢人間事  
唯有春風不世情

皮日休六首

字襲美咸通八年登進士第

旅舍除夕

永夜誰能守羈心不放眠挑燈猶故歲聽角已新年出  
谷空嗟晚銜杯尚愧先晚來辭逆旅雪涕野槐天

過雲居院玄福上人舊居

重到雲居獨悄然隔窻窺影尚疑禪不逢野老來聽法  
猶見鄰僧為引泉龕上已生新石耳壁間空帶舊茶煙  
南宗弟子時時到泣把山花奠几筵



陪江西裴公遊襄州延慶寺

丹霄路上歇征輪勝地偷閒一日身不著前驅驚野鳥  
惟將後乘載詩人巖邊候吏雲遮却竹下朝衣露滴新  
更向碧山深處問不妨猶有草茅臣

西塞山泊漁家

白綸巾下髮如絲靜倚楓根坐釣磯中婦桑村挑葉去  
小兒沙市買蓑歸雨來蓴菜流船滑春後鱸魚墜釣肥  
西塞山前終日客隔波相羨盡依依

襄州春遊

信馬騰騰觸處行春風相引與詩情等閒遇事成歌詠  
取次衝筵隱姓名映柳認人多錯誤透花窺鳥最分明  
岑牟單絞何曾著莫道猖狂似禰衡

送從弟歸復州

羨爾優遊正少年竟陵煙月似吳天車螯近岸無妨取  
舴艋隨風不費牽處處路傍千頃稻家家門外一渠蓮  
慙慙莫笑襄陽住為愛南塘縮項鱸



唐百家詩選卷十八

欽定四庫全書

唐百家詩選卷十九

宋 王安石 編

劉滄四首

字蘊靈大中八年進士及第

長洲懷古

野燒空原盡荻灰  
吳王此地有樓臺  
千年事在人何在  
半夜月明潮自來  
白鳥影從江樹沒  
清猿聲入楚雲哀  
停車日晚薦蘋藻  
風靜寒塘花正開

經煬帝行宮

此地曾經翠輦過浮雲流水竟如何香銷南國美人盡  
怨入東風芳草多殘柳宮前空露葉夕陽川上浩煙波  
行人遙起廣陵思古渡月明聞棹歌

與僧話舊

巾舄同時下翠微舊遊因話事多違南朝古寺幾僧在  
北嶺空林唯鳥歸莎徑晚煙凝竹塢石池春色染苔衣  
此來相見又相別即是關河朔鴈飛

咸陽懷古

經過此地無窮事一望悽然感廢興  
渭水故都秦二世咸原秋草漢諸陵  
天空絕塞聞邊鴈葉盡孤村見夜燈  
風景蒼蒼多少恨寒山半出白雲層

劉威一首

遊東湖黃處士園林

偶向東湖更向東數聲雞犬翠微中  
遙知楊柳是門處似隔芙蓉無路通  
樵客出來山帶雨漁舟過去水生風

物情多與閒相稱所恨求安計不同

曹鄴一首

始皇陵下作

千金買魚燈泉下照狐兔行人上陵過却弔扶蘇墓壘  
壘塘中物多於養生具若使山可移應將秦國去舜歿  
雖在前今猶未封樹

曹松十四首

長安春日



浩浩看花晨六街揚遠塵塵中一丈日誰是晏眠人御  
柳垂著水野鶯啼破春徒云多失意猶自惜離秦

晨起

曉色教不睡卷簾清氣中林殘數枝月髮冷一梳風並  
鳥含鍾語欹河隔霧空莫疑營白日道路本無窮

秋日送方干遊上元

天高淮泗白料子趨修程汲水疑山動揚帆覺岸行雲  
離京口樹鴈入石頭城後夜分遙念諸峰霧露生

金谷園

當年歌舞時不說草離離今日歌舞盡滿園秋露垂

夏日東齋

三庚到秋伏偶來松檻立熱少清風多開門放山入

送喻坦之遊太原

北鄙征難盡詩愁滿去程廢巢侵燒色荒塚入鋤聲逗  
野河流濁離雲磧日明并州戎壘地角動引風生

塞上

邊寒來處濶今日復明朝河凌去聲堅通馬胡雲缺見鷗  
沙中程獨泣鄉外隱誰招回首苦經歲靈州生柳條

題鶴鳴泉

仙鶴曾鳴處泉兼半井苔直峰拋影入片月寫光來  
澗澗侵顏冷深沉慰眼開何因值丹頂滿汲石甃回

己亥歲二首

南國江山入戰圖生民何計樂樵蘇憑君莫話封侯事  
一將功成萬骨枯

波間一戰百神愁  
兩岸強兵過未休  
誰道滄江總無事  
近來常共血爭流

南海旅次

憶歸休上越王臺  
歸思臨高不易裁  
為客正當無鴈處  
故園誰道有書來  
城頭早角吹霜盡  
郭裏殘潮蕩月回  
心似百花間  
未得年年爭發被春催

陪湖南李中丞宴隱谿

璋

竹林啼鳥不知休  
羅列飛橋水亂流  
觸散柳絲回玉勒

約開蓮葉上蘭舟  
酒邊舊侶真何遜  
雲裏新聲是莫愁  
若值主人嫌晝短  
應陪秉燭夜深遊

別湖上主人

門繫釣舟雲滿岸  
借君幽致坐移旬  
湖村夜叫白燕鴈  
菱市曉喧深浦人  
遠水日邊重作雪  
寒林燒後別生春  
不辭更住醒還醉  
太一東峰歸夢頻

商山贈野叟

垂白商於原下住  
兒孫共死一身忙  
木弓未得長離手

猶與官家射麝香

張喬二首

送河西從事

結束佐戎旃河西住幾年  
隴頭隨日去磧裏寄星眠  
水近沙連帳程遙馬入天  
聖朝思上策重待奏安邊

送進士許崇

離鄉積歲年歸路遠依然  
夜火山頭市春江樹杪船  
干戈愁鬢改瘴癘喜家全  
何處營甘旨潮濤浸薄田

劉駕一首

釣臺懷古

澄流可濯纓嚴子但垂綸孤坐九層石遠笑清渭濱潛  
龍飛上天四海豈無雲清氣不零雨安使洗塵氛我來  
吟高風髣髴見斯人江月尚皎皎江石亦磷磷如何臺  
下路明日又迷津

崔魯十二首

春日長安即事

一百五日又欲來梨花梅花參差開行人自笑不歸去  
瘦馬獨吟真可哀杏酪漸香隣舍粥榆煙將變舊爐灰  
玉樓春暖清歌夜肯信愁腸獨九回

春晚岳陽城言懷

翠煙如鈿柳如環晴倚南樓獨看山江國草花三月晚  
帝京塵夢一年間虛舟尚笑紫難解飛鳥空慙倦未還  
何似不羈簷父伴睡煙歌月老潺潺

煙花零落過清明異國光陰老客情雲夢夕陽愁裏色



洞庭春浪坐來聲  
天邊一與舊山別  
江上幾看芳草生  
獨凭欄干意難寫  
暮笳鳴軋調孤城

過蠻溪渡

綠楊如髮雨如煙  
立馬危橋獨喚船  
山口斷雲迷舊路  
渡頭芳草憶前身  
身隨遠道徒悲梗  
詩賣明時不值錢  
歸去楚臺還有計  
釣船春雨日高眠

暮春對花

病香無力被風欺  
多在青苔少在枝  
馬上行人莫回首

斷君腸是欲殘時

華清宮四首

銀河漾漾月輝輝  
樓礙星邊織女機  
橫玉叫雲清似水  
滿空霜逐一聲飛

障掩金雞蓄禍機  
翠環西拂蜀雲飛  
珠簾一閉朝元閣  
不見人歸見燕歸

草遮回磴絕鳴鑿  
雲樹深深碧殿寒  
明月自來還自去  
更無人倚玉闌干

門橫金鑠悄無人  
落日秋聲渭水濱  
紅葉下山寒寂寂  
濕雲如夢雨如塵

春晚泊船江村

芳草青青古渡頭  
漁家住處暫維舟  
殘花半樹悄無語  
細雨滿天風似愁  
家信不來春又晚  
客程難盡水空流  
自憐愛失心期約  
看取花時更遠遊

山路見花

曉紅初坼露香新  
獨立空山冷笑春  
春意自知無主惜

恣風吹逐馬蹄塵

岸梅

含情含態一枝枝斜壓漁家短短籬  
惹袖尚憐香半日向人如訴雨多時  
初開偏稱雕梁畫未落先愁玉笛吹  
行客見來無去意解帆煙浦為題詩

張蠙六首

字象文昭宗時為尚書膳部員外郎

社日村居

鵝湖山下稻梁肥  
犝穿雞棲對掩扉  
桑柘影斜春社散

家家扶得醉人歸

送友人歸武陵

聞近桃源住無村不是花  
戍旗招海客廟鼓集江鴉  
別島垂橙實間田長荻芽  
遊秦未得意看即更離家

別後寄友人

上馬如飛鳥飄然隔去塵  
共看今夜月獨作異鄉人  
就養江田熟移居井賦新  
襄陽堪卜隱應與孟家隣

送友人赴涇州幕

杏園沉飲散榮別就嘉招日月相期盡山川獨去遙府  
樓明蜀雪關磧轉胡鷗縱有煙塵動應隨上策銷

野泉

遠出白雲中長年聽不窮細聲縈石亂寒色入潭空挂  
壁聊成雨穿林別起風溫泉非爾類源發在深宮

述懷

白首成空事無歡可替悲空餘酒中興猶似少年時

方干二首

字雄飛新定人咸通中進士不第隱會稽之鏡湖及江東人謂為玄英先生

君不來

遠路東西欲問誰  
寒來無處寄寒衣  
去時初種庭前樹  
樹已勝巢人未歸

山中

愛山却把圖書賣  
嗜酒空教僮僕賒  
只向堦前便漁釣  
那知枕上有雲霞  
暗泉出石飛仍咽  
小徑通橋直復斜  
窻竹未抽今夏筍  
庭梅曾試當年花  
姓名未及陶弘景  
髭鬢白於姜子牙  
松月水煙千古在  
未知終久屬誰家

王駕四首

字大用河中大順初進士及第任至尚書禮部員外郎自稱守素先生與司

空園鄭谷相

善為詩友

古意

夫戍蕭關妾在吳  
西風吹妾妾憂夫  
一行書信千行淚  
寒到君邊衣到無

過故友居

隣笛寒吹日落初  
舊居今已別人居  
亂來兒姪皆分散  
惆悵僧房認得書



晴景

雨前初見花間藥  
雨後兼無葉裏花  
蛟蝶飛來過牆去  
應疑春色在隣家

亂後曲江

憶昔爭遊曲水濱  
未春長有探春人  
遊春人盡空池在  
直至春深不似春

杜荀鶴四首

字彥之自稱九華山人  
大順中登進士第

春宮怨

早被嬋娟誤欲粧臨鏡慵承恩不在貌教妾若為容風  
暖鳥聲碎日高花影重年年越溪女相憶採芙蓉

雪

風攪長空寒骨生先於曉色報窻明江湖不見飛禽影  
巖谷唯聞折竹聲巢穴幾多相似處路歧兼得一般平  
擁袍公子莫言冷中有樵夫跣足行

溪興

山雨溪風卷釣絲瓦甌蓬底獨斟時醉來睡著無人喚

流下前溪也不知

哭具韜

交朋來哭我來歌喜傍山家葬薜蘿四海十年人殺盡  
似君埋少不埋多

唐百家詩選卷十九

欽定四庫全書

唐百家詩選卷二十

宋 王安石 編

吳融二十七首

字子華昭宗時為翰林學士戶部侍郎

壬戌歲閔鄉卜居

六載抽毫侍禁闈不堪多病決然歸五陵年少如相問

阿對泉頭一布衣

阿對是揚伯起家僮嘗引泉灌蔬其泉至今尚在

野廟

古原荒廟掩莓苔何處喧喧鼓笛來日暮烏啼人散盡  
野風吹起紙錢灰

小徑

礙竹妨花一徑幽攀緣應對玉峰頭若教須似康莊好  
便有高車駟馬憂

間望

三點五點映山雨一枝兩枝臨水花蛺蝶狂飛掠芳草  
鴛鴦熟睡翹暖沙闕下新居非已業江南舊隱是誰家

東還西去都無計，却羨暝歸林上鷓。

即事

抵鵲山前寄掩扉，便甘終老脫朝衣。  
曉窺清鏡千峰入，暮倚長松獨鶴歸。  
雲裏引來泉脈細，雨中移得藥苗肥。  
何須一筋鱸魚膾，始挂孤帆問釣磯。

書懷

傍巖依樹結簷楹，夏物蕭疎景更清。  
灘響忽高何處雨，松陰自轉遠山晴。  
見多隣犬遙相認，來慣幽禽近不驚。

爭敢便誇饒勝事九衢塵裏免勞生

海棠

太尉園林兩樹春

今番禺太尉徐公興化亭子有海棠兩株

年年奔走探花

人今來獨傍荆山看回首長安落戰塵

寄貫休

休公何處在知我宦情無已似馮唐老方知武子愚一  
身仍更病雙闕又須趨若得重相見冥心學半銖

楚事



悲秋應亦抵傷春  
屈宋當年並楚臣

屈原云目極千里傷春心宋玉云悲

哉秋之為氣

何事從來好時節  
只將惆悵付詞人

### 金橋感事

太行和雪疊晴空  
二月郊原尚朔風  
飲馬早聞臨渭北  
射鵰今欲過山東  
百年徒有伊川歎  
五利寧無魏絳功  
日暮長亭正愁絕  
哀笳一曲戍煙中

### 送策上人

昨來非有意  
今去亦無心  
闕下拋新院  
江南指舊林  
餅

添新澗綠笠卸晚峰陰八字如相許終辭尺組尋

松江晚泊

樹遠天疑盡江奔地欲隨孤帆落何處殘日更新離客  
是淒涼本情為繫滯枝寸腸無計免應只楚猿知

廢宅

風飄碧瓦雨摧垣却有隣人為鏤門幾樹好花虛白晝  
滿庭荒草易黃昏放魚池涸蛙爭聚棲燕梁空雀自喧  
不獨淒涼眼前事咸陽一火便寒原

途中

一棹歸何處蒼茫落照昏無人因失路有樹始知村湖  
岸春耕廢江城戰鼓喧儒冠竟相悞學劍盡乘軒

岐下聞杜鵑

化去蠻鄉北飛來渭水西為多亡國恨不忍故山啼怨  
已驚秦鳳靈應識漢雞數聲煙漠漠餘思草萋萋樓迴  
波無際林昏日又低如何不腸斷家近五雲溪

杏花三韻

春物競相妬杏花應最嬌紅輕欲愁殺粉薄似啼消願  
作南華夢翩翩遠此條

華清宮三首

中原無鹿海無波鳳輦鸞旗出幸多今日故宮歸寂寞  
太平功業在山河

四郊飛雪暗雲端唯此宮中落旋乾綠樹碧簷相掩映  
無人知道外邊寒

漁陽烽火照函關玉輦怱怱下此山一曲羽衣聽不盡

至今遺恨水潺潺

春寒

固教梅忍落休與杏藏嬌已過冬疑剩將來暖未饒玉  
堦殘雪在羅薦暗香銷莫問王孫恨煙蕪尚寂寥

彭門用兵後經汴路

長亭一望一徘徊千里關河百戰來細柳舊營猶鏢月  
祁連新冢已封苔霜凋綠野愁無際燒接黃雲慘不開  
若比江南更牢落子山詞賦莫興哀

隋堤風物已淒涼  
堤下仍多舊戰場  
金鏃有苔人拾得  
蘆花無主鳥銜將  
秋聲暗促河聲急  
野色遙連日色黃  
獨上寒城正愁絕  
戍聲驚起鴈行行

高侍御話皮博士池中白蓮因寄

白玉花開綠錦池  
風流御史報人知  
看來應是雲中墮  
偷去須從月下移  
已被亂蟬催晚晚  
更禁涼雨動離離  
習家秋色堪圖畫  
只欠山公倒接羅

新安道中翫流水

一渠春碧弄潺潺密竹繁花掩映間  
看處便須終日住  
算來爭得此身閒  
縈紆似接迷人洞  
清冷應連有雪山  
上却征車更回首  
了然塵土不相關

憶山泉

穿雲落石細湔湔  
杳杳疑聞弄管絃  
千仞灑來寒碎玉  
一泓深處碧涵天  
煙迷葉亂尋難見  
月好風清聽不眠  
春雨正多歸未得  
只應流恨更潺湲

紅樹

一聲南鴈已先紅  
槭槭淒淒葉葉同  
自是孤根非暖地  
莫驚他木耐秋風  
曉煙散去陰全薄  
明月臨來影半空  
長憶洞庭千萬樹  
照山橫浦夕陽中

微雨

天清織未遍  
風急舞難成  
粉重低飛蝶  
黃濃不語鶯  
乍隨春靄亂  
還放夕陽明  
惆悵池塘遠  
荷珠點點輕

韓偓五十九首

字致光一云字致堯昭宗時翰林學士承旨尚書兵部侍郎

雨後月中玉堂閒坐



銀臺直北金鑿外暑雨初晴皓月中唯對松篁聽刻漏  
更無塵土翳虛空綠香熨齒冰盤果清冷侵肌水殿風  
夜久忽聞鈴索動玉堂西畔響丁東

六月十七日召對自辰及申方歸本院

清暑簾開散異香恩深咫尺對龍章花應洞裏常時發  
日向壺中特地長坐久忽疑槎犯斗歸來兼恐海生桑  
如今冷笑東方朔唯用談諧侍漢皇

中秋禁直

星斗疎明禁漏殘紫泥封後獨憑欄露和玉屑金盤冷  
月射珠光貝闕寒天襯樓臺籠苑外風吹歌管下雲端  
長卿抵為長門賦未識君臣際會難

錫宴日作

是歲大稔內出金帛錫百官充觀稼  
宴學士院別賜越綾百匹委京尹句

當後宰相一日

宴于興化亭

玉銜花馬踏香街詔遣追懽綺席開中使押從天上去  
是日在外四學士排門齊入同進狀  
辭赴宴所奉差學士院使二人押去外人知自日邊來  
臣心淨比漪連水聖澤深於漱灑杯纔有異恩頒稷高

已將優禮及鄒枚清商適向梨園降妙妓新行峽雨回  
不敢通宵離禁直晚乘殘醉入銀臺

冬至夜作

天復二年隨  
駕在鳳翔府

中宵忽見動葭灰料得南枝有早梅四野便應枯草綠  
九重先覺凍雲開陰冰莫向河源塞陽氣今從地底回  
不道慘舒無定分却憂蚊響又成雷

秋霖夜憶家

隨駕在  
鳳翔府

垂老何時見弟兄背燈悲泣到天明不知短髮能多少

一滴秋霖白一莖

出官經峽石縣

天復三年三月二十日作

謫宦過東畿所抵州名濮故里欲清明臨風堪慟哭溪

長柳似惟山暖花如醜逆旅訝簪裾

南路以久無儒服經過皆相聚觀

野老悲陵谷暝鳥影聯翩驚狐尾燾遯尚得佐方州信

是皇恩沐

訪同年虞部二十五郎中

四年二月在湖南

策蹇相尋犯雪泥厨煙未動日平西門庭野水灘襪鷺

隣里短牆啣喔雞未入慶霄君擇肉畏逢華穀我吹壘  
地爐貰酒成狂醉更覺襟懷得喪齊

春陰獨酌寄同年李郎中

春陰漠漠土脈潤寒氣微微風意和閒啜入甲奔競態  
醉唱落調漁樵歌詩道揣量疑可進宦情刳缺轉無多  
酒酣狂興依然在無奈千莖鬢雪何

雪中過重湖信筆偶成

道方時險擬如何謫去甘心隱薜蘿青草湖將天暗合

白頭浪與雪相和，旗亭臘酌踰年熟。  
水國春寒向晚多，處困不忙仍不怨。  
醉來唯是欲傚傚。

寄湖南從事

索漠襟懷酒半醒，無人一為解餘醒。  
岸頭柳色春將盡，船背雨聲天欲明。  
去國正悲同旅鴈，隔江何忍更啼鶯。  
蓮花幕下風流客，試與溫存謹逐情。

翫水禽

此後七首  
醴陵縣作

兩兩珍禽渺渺溪，翠衿紅掌淨無泥。  
向陽眠處莎成毯。

踏水飛時浪作梯，  
依倚雕梁輕社燕。  
抑揚金距笑晨雞，  
勸君細認漁翁意。  
莫遣絙羅誤穩棲。

早雪翫梅有懷親友

北陸候纔變，南枝花已開。  
無人同悵望，把酒獨徘徊。  
凍白雪為伴，寒香風是媒。  
何因逢越使，腸斷謫仙材。

小隱

借得茅齋岳麓西，  
擬將身世老鋤犁。  
清晨向市煙涵郭，  
寒夜歸村月照溪。  
爐為窻明僧偶坐，  
松因雪折鳥驚啼。

靈椿朝菌由來事却笑莊生始欲齊

曛黑

古木侵天日已沉  
露華涼冷潤衣襟  
江城曛黑人行絕  
唯有啼烏伴夜砧

醉着

萬里清江萬里天  
一村桑柘一村煙  
漁翁醉着無人喚  
過午醒來雪滿船

早起三韻



萬樹綠楊垂千般黃鳥語庭花風雨餘岑寂如村塢依  
依官渡頭晴陽照行旅

即目

萬古離懷憎物色幾年愁緒溺風光廢城沃土肥春草  
野渡空船蕩夕陽倚道向人多脈脈為情因酒易悵悵  
官途弃擲須甘分回避紅塵是所長

贈易卜崔江處士

袁州

白首窮經通祕義青山養老度危時門傳組綬身能退

家學樵漁跡更奇四海盡聞龜策妙九霄堪嘆鶴書遲  
壺中日月將何用借與閒人試一窺

乙丑歲九月蕭灘鎮忽得楊迨員外書賀余除  
戎曹仍舊承旨還絨後因書四十字

旅寓在江郊秋風正寂寥紫泥虛寵獎白髮已漁樵事  
往淒涼在時危志氣銷若為將朽質猶擬杖於朝

登南臺僧寺

無奈離腸日九回強攄懷抱立高臺中華地向城邊盡

外國雲從島上來四序有花長見雨一冬無雪却聞雷  
日宮紫氣生冠冕試望扶桑病眼開

花時與錢尊師同醉因成二十字

橋下淺深水竹間紅白花酒仙同避世何用厭長沙

有矚

晚涼閒步向江亭默默看書旋旋行風轉滯帆狂得勢  
潮來諸水寂無聲誰將覆轍詢長策願把琴絲屬老成  
安石本懷經濟意何妨一起為蒼生

蜻蜓

碧玉眼睛雲母翅，輕於粉蝶瘦於蜂。  
坐來迎拂波光舞，可是慙慙為蓼叢。

宮柳

此後二首  
在內庭作

莫道秋來芳意違，宮娃猶似妬蛾眉。  
幸當玉輦經過處，不怕金風浩蕩時。  
草色長承垂地葉，日華先照映樓枝。  
澗松亦有凌雲分，爭似盤根太液池。

苑中

上苑離宮處處迷，相風高與露盤齊。金堦鑄出狻猊立。

玉柱雕成狒狒啼，外使調鷹初得案。

五坊外案使以鷹隼初調習始能擒

獲謂之得案

中官過馬不教嘶。

上每乘馬必閱官馭以進謂之過馬既乘之而後蹀躞嘶

也 笙歌繡錦雲霄裏，獨許詞臣醉似泥。

即目

書牆暗記移花日，洗瓮先知醞酒期。須信閒人有忙事。

早來衝雨覓漁師。

過臨淮故里

交遊昔歲已凋零第宅今來亦變更舊廟荒涼時饗絕  
諸孫饑凍一官成五湖竟負他年志百戰空垂異代名  
榮盛幾何流落久遣人襟抱薄浮生

亂後却至近甸有感

乙卯  
年作

狂童容易犯金門比屋齊人作旅魂夜戶不扃生茂草  
春渠自溢浸荒園關中却見屯邊卒塞外翻聞有漢村  
堪恨無情清渭水渺茫依舊遶秦原

寄隣莊道侶

聞說經旬不啓關  
藥窻誰伴醉開顏  
夜來雪壓村前竹  
剩見溪南幾尺山

亂後春日途經野塘

世亂他鄉見落梅  
野塘晴煖獨徘徊  
船衝水鳥飛還住  
袖拂楊花去又來  
季重舊遊多喪逝  
子山新賦極悲哀  
眼看朝市成陵谷  
始信昆明是劫灰

惜花

皺白離情高處切  
膩紅愁態靜中深  
眼隨片片沿流去

恨滿枝枝被雨淋  
總得苔遮猶慰意  
便教泥污更傷心  
臨軒一盞悲春酒  
明日池塘是綠陰

半醉

水向東南更不回  
紅顏白髮遞相催  
壯心暗逐高歌盡  
往事空因半醉來  
雲護鴈霜籠淡月  
雨連鶯曉落殘梅  
西樓悵望芳菲節  
處處斜陽草似苔

漢江行次

村寺雖深已暗知  
幡竿殘日迴依依  
沙頭有廟青林合



驛步無人白鳥飛  
牧笛自由隨  
草遠漁歌得意扣  
舷歸  
竹園相接春波暖  
痛憶家鄉舊釣磯

春盡

惜春連日醉昏昏  
醒後衣裳見酒痕  
細水浮花歸別澗  
斷雲含雨入孤村  
人間易有芳時恨  
地勝難招自古魂  
慚愧流鶯相厚意  
清晨猶為到西園

贈湖南李思齊處士

兩板船頭濁酒壺  
七絲琴畔白髭鬚  
三春日日黃梅雨

孤客年年青草湖，燕俠冰霜難狎。近楚狂鋒刃觸，凡愚知余絕粒，窺仙事許到名山，看藥爐。

睡起

睡起牆陰下藥欄，瓦松花白閉柴關。斷年不出僧嫌癖，逐日無機鶴伴閒。塵土莫尋行止處，煙波長在夢魂間。終撐舴艋稱漁叟，賒買湖心一崦山。

寄友人

傷時惜別心交加，搢頤一向千咨嗟。曠野風吹寒食月。

廣庭煙著黃昏花長擬曛酣遣世事若為局促問生涯  
夫君亦是多情者幾度將愁泥酒家

見別離者因贈之

征人草草盡戎裝征馬蕭蕭立路傍樽酒闌珊將遠別  
秋山邈迤更斜陽白髭兄弟中年後瘴海程途萬里長  
曾向天涯懷此恨見君嗚咽更淒涼

傷亂

岸上花根總倒垂水中花影幾千枝一枝一影寒山裏

野水野花清露時故國幾年猶戰鬪異鄉終日見旌旗  
交親流落身羸病誰在誰亡兩不知

南亭

每日在南亭南亭似僧院人語靜先聞鳥啼深不見松  
瘦石稜稜山光溪澱澱塹蔓墜長茸島花垂小簷行簪  
隱士冠臥讀先賢傳更有興來時取琴彈一遍

太平谷中翫水上花

山頭水從雲外落水面花自山中來一溪紅點我獨惜

幾樹密房誰見開，應有妖魂隨暮雨。  
豈無香跡在蒼苔，凝眸不覺斜陽盡。  
忘逐樵人躡石回。

雨

坐來敕敕山風急，山雨隨風暗原隰。  
樹帶繁聲出竹聞，溪將大點穿籬入。  
餉婦寒翹布領寒，牧童擁茸蓑衣濕。  
此時高味共誰論，掩鼻吟詩空佇立。

幽獨

幽獨起侵晨，山鶯啼更早。  
門巷掩蕭條，落花滿芳草。  
煙

愁魂共遠春與人同老  
默默又依依  
凄然此懷抱

江行

浪撼青山江北岸  
雲含黑雨日西邊  
舟人偶語憂風色  
行客無聊罷晝眠  
爭似槐花九衢裏  
馬蹄安穩慢揚鞭

初赴朝集

輕寒著背雨淒淒  
九陌無塵未有泥  
還是平時舊滋味  
慢垂鞭袖向街西

向隅

守道得途遲中魚遇亂離剛腸成繞指玄髮變垂絲客  
路少安處病床無穩時弟兄消息絕獨歛向隅眉

秋郊閒望有感

楓葉微紅近有霜碧雲秋色滿吳鄉魚衝駭浪雪鱗健  
鴉閃夕陽金背光心為感恩長慘戚鬢綠經亂早蒼浪  
可憐廣武山前事楚漢寧教作戰場

襄漢旅道值隣境軍新過村落皆空因有此感  
水自潺湲日自斜盡無雞犬有鳴鴉千村萬落似寒食

不見人煙空見花

深院

鵝兒啞啞梳黃嘴鳳子輕盈膩粉腰深院下簾人晝寢  
紅薔薇架碧芭蕉

辛酉冬隨駕日作今方追憶全篇因附於此

曳裾談笑殿西頭忽聽征鏡從冕旒鳳蓋行時移紫氣  
鸞旗駐處認皇州曉題御服頒羣吏夜發宮嬪詔列侯  
雨露涵濡三百載不知誰擬殺身酬



安貧

手風慵展八行書  
眼暗休尋九局圖  
窻裏日光飛野馬  
案頭筠管長蒲盧  
謀身拙為安蛇足  
報國危曾捋虎鬚  
滿世可能無默識  
未知誰擬試齊竽

殘春旅舍

旅舍殘春宿雨晴  
恍然心地憶咸京  
樹頭蜂抱花鬚落  
池面魚吹柳絮行  
禪伏詩魔歸靜域  
酒衝愁陣出奇兵  
兩梁免被塵埃污  
拂拭朝簪待眼明

鵲

偏承雨露潤  
毛衣黑白分明  
衆所知高處  
營巢親鳳闕  
靜時閒語上  
龍墀化為金  
印新祥瑞  
飛向銀河舊  
路岐  
莫怪天涯棲  
不穩  
託身須是萬  
年枝

隰州新驛

盛德已圖形  
胡為忽構兵  
燎原雖自及  
誅亂不無名  
擲鼠須防誤  
連雞莫憚驚  
本期將係虜  
末策但嬰城  
肘腋人情變  
朝廷物論生  
果聞荒谷縊  
旋覩縈街烹  
帝怒今

方息時危喜暫清始終俱以此天意甚分明

偶題

俟時輕進固相妨實行丹心仗彼蒼蕭艾轉肥蘭蕙瘦  
可能天亦妬馨香

湖南絕少含桃偶人以新摘者見惠感事傷懷  
因成四韻

時節雖同氣候殊未知堪薦寢園無合充鳳食留三島  
誰許鶯偷過五湖苦笋恐難同象匕

秦中謂三月  
為櫻笋時

酪漿

無復瑩蠙珠

湖南無牛酪之味

金鑾歲歲長宣賜  
忍淚看天憶

帝都

每歲初進之後先宣賜學士


翠碧鳥

天長水遠網羅稀  
保得重重翠碧衣  
挾彈少年多害物  
勸君莫近五陵飛

憶故都

故都遙想草萋萋  
上帝深疑亦自迷  
塞鴈已侵池籞宿  
宮鴉猶戀女牆啼  
天涯烈士空垂涕  
地下強魂必噬臍

掩鼻計成終不覺馮諼無路効鳴雞



唐百家詩選卷二十